

Cale tempus benidore pro su pastoriu?

Andadu male su tentativu de cunfrontu cun sos industriales pro su preju de su late

In Sardinna su preju de su late berbeghinu est meda prus bassu de cussu de àteras rezones italianas

Sa caparra òbrigat sos pastores sardos a versare su late a unu preju chi a su mamentu non connoschent

In un'artìculu essidu in custu giornale pagu tempus a como amus iscritu chi pro garantire unu tempus benidore a su pastoriu b'at bisonzu de cumintzare un'àndala chi cunsentat de ammodernare totu su pastoriu e chi custu si podet fàghere solu si a totus intrat in conca chi petzi cun sos acordos e cun sos cuntratos si podet sarvare su pastoriu.

S'artìculu sighiat nende chi Confagricoltura Sardinna est disposta a abèrrere unu cunfrontu sèriu a livellu regionale cun totu sa filiera, e chi dae custu cunfrontu depet essere finas unu sistema chi inditet sos elementos pro arribare a fàghere su prèju de su late.

S'artìculu tancaiat ponende una pregunta a sos industriales: s'ant a chèrrere cunfrontare custa borta o ant a sighire a impònere su prèju issoro isetende chi si che mòrnat de su tou unu setore chi zai est moribundu?

S'imposta a custa dimanda est arribada sas dies coladas cando s'assessore regionale a sa Massaria Oscar Cherchi su 4 de santugaine at convocadu sas partes, sindacados de sa massaria e industriales de su late, pro faeddare de sas políticas de praticare pro sa crèschida de su pastoriu sardu.

In cust'addòviu sas partes ant chircadu de faeddare finas de sos elementos pro arribare a fàghere su prèju de su late.

Sos industriales galu un'àtera borta ant fatu bìere su dispreju pro su cunfrontu e ant naradu craru craru chi non cherent règulas e chi "su preju de su late lu podet fàghere su mercadu ebia".

Confagricoltura Sardinna cuncordat a prenu cun cust'ùrtima cosa chi narant sos industriales.

Su chi si cheret fàghere difatis est de inditare sos elementos pros arribare a fàghere su prèju de su late, chi est diferente meda dae fàghere su prèju de su late chi est zustu chi lu fagat su mercadu comente narant sos industriales. Ma cale mercadu? Cussu beru o cussu fabulosu de sos industriales de su late sardos? Ca sos industriales est pròpiu su preju de mercadu chi non cherent pagare.

Sos Organizatziones Agrìculas difatis ant propositu unu mecanismu pro arribare a su preju de su late chi tenzat contu de sos elementos reales de mercadu e duncas de totu sos datos chi pertocant sa produtzione, sa trasformatzione e su cumèrtziu e chi sos entes chi daent custos datos si

distingant e siant reconnotos e atzetados dae totus pro èssere entes chi daent datos craros, zustos e seguros.

Sos industriales imbetzes negant custu sistema, non charent sas règulas de su mercadu e che a semper charent impònner su preju issoro e sighire cun su connotu. Che a semper charent aprofitare de su pastore, chi at bisonzu de dinare, dendeli sa caparra chi pro su pastore cheret nàrrere a firmare una cambiale in biancu a s'industriale, ma a dolu mannu non nde podet fàghere a mancu e custu s'industriale l'ischit bene.. Dae su mamentu chi su pastore atzetat sa caparra cumintzat a versare su late sena ischire su preju chi l'at a bènnere pagadu. Duncas su pastore retzit unu tantu istabilidu dae s'industriale a cumintzu e su preju finale l'at a fàgher semper s'industriale cunforme a comente andat su mercadu, su mercadu fabulosu de s'industriale non cussu beru, de su casu,. Custu a cada manera cheret narrer a iscarrigare subra su pastore una paret de s'arriscu de impresa de s'industriale de su late.

E si in àteras rezones italianas de importu che a su Lazio sa Toscana su preju de su late de berveghe at unu balore chi andat dae 80 a 90 tzentèsimos de èuros e in Ispanna e Frantza arribat finas a 1,15 èuros, pro sos industriales sardos su late sardu balet 60-65 tzentèsimos. Custu preju sos industriales lu fàghent cunforme a su preju de su casu romanu chi isso belle belle non faghent prus.

Sos industriales difatis pro su 67% faghent casos diferentes chi bendent a prejos meda prus artos de su casu romanu.

Est custu su mercadu pro sos industriales de su late sardos? Est custu pro issos su mercadu liberu e ladinu? A bisu nostru custu est unu sistema de menetas e de recatos chi impreat sa fortza pro istrutare e furare su profitu de su traballu de sos pastores sardos.

Bidu chi sos industriales no atzetant règulas sas Organizatziones Agrìculas ant chircadu deretu àteras àndalas pro agatare una solutzione chi permitat de bèndere su late a unu preju reale de mercadu.

Intantu ant pedidu a s'assessore Cherchi de praticare in presse s'art. 23 de sa Leze Rezionale 15/2010, chi torrat a bogare a campu su prestidu de campanna chi diat permitere a sos pastores de s'isfrancare de sa caparra, e s.art. 9 de sa matessi leze subra s'Osservàtoriu de su compartu ovi-caprinu chi diat dèpere cunsentire de connòschere a finu su mercadu.

Segundariamente sas Organizatziones Agrìculas sunt istudiende pro bogare a craru duos mèdios econòmicos:

1. fàghere un'asta pùblica a ue si mutint cooperativas e industriales dae totu Itàlia, e finas de foras, interessados a comporare late berbeghinu sardu;
2. fàghere paris cun sa Sfirs unu consòrtziu de segundu gradu chi depet aunire su casu romanu de sas cooperativas (oe su 67% de totu su romanu chi si faghet in Sardinna) e chi pro more de unu *manager* espertu chi connoscat a beru su mercadu siet a tretu de bèndere su casu romanu in totu su mundu.

Si sa prima soluzione no est fàtzile de praticare in presse, sa segunda diat dèvere mòere deretu e intro pagas dies s'assessore Cherchi diat dèvere mutire sas Organizzazioni Agrìcolas e sas Organizzazioni de sas cooperativas pro ammaniare paris su traballu e cumintzare a bèndere ite si podet fàghere.

Confagricoltura Sardinna est cumbinta chi si si faghet custas duas cosas si podet cuntrastare e bèndere su podere, sa tusturrunia e s'atrivimentu de sos industriales de su late.